

SCRIPT OF MORNING GOJRI NEWS BULLETIN 13NOV 2025  
1015HRS

مارنگ گوجری نیوز بولیٹن 13 نومبر 2025

\*\*\*\*\*

یوہ آکاشوانی جموں ہے عبیدالرحمان تین خبر سُنو۔

\*\*\*\*\*

LG FILM FEST

لیفٹیننٹ گورنر منوج سنہا نے گزشتہ روز اُمید گروپ غی طرفوں سرینگر مانہ منعقد بین العوامی فلم تہوار غے دوران بولتا مانہ کہیو ہے کہ سماج مانہ مکمل امن قائم کرن خاطر عوام غا تمام طبقات غا سانجا تال میل نال تمام دہشت گرد عناصر نال ختم کرنو وے غو موصوف نے فلم بنان آلا افراد نانہ کہیو کہ وے اس قسم غی فلم بناویں جن مانہ دہشت گردی نال متاثر افراد آلے پاسے سب غی نظر جے تے دہشت گردی گا نظام نانہ ہے نقاب کیو جاسکے اُنہاں نے مزید کہیو کہ گزشتہ 5 تے 6 براں مانہ حفاظتی دستاں غی کوششاں نال جموں کشمیر غے اندر امن غو ماحول قائم ہویو ہے جس نال نوجوان نسل نانہ ترقی غا کئی موقعہ فراہم ہویا ہیں۔

\*\*\*\*\*

DGP PROPERTY ATTACHED

جموں کشمیر پولیس غا ڈائریکٹر جنرل نے یو اے پی اے قانون غے تحت سرینگر مانہ ایڈووکیٹ میاں عبدالقیوم غی جائیداد ضبط کرن غو حکم دتو ہے ڈی جی پی غی طرفوں جاری حکم نامہ مانہ دسیو گیو ہے کہ میاں عبدالقیوم نے 31 دسمبر 2009 مانہ ایک سپینار مانہ بھارت مخالف تقریر کی تے ہندوستان غے خلاف نعرہ لایا تھا۔ حکم نامہ مانہ مزید دسیو گیو ہے کہ اس معاملہ غی مزید تحقیقات کرتا مانہ مذکورہ شخص غا کھر غی تلاشی لی گئی جس دوران میاں عبدالقیوم غے گہراں مانہ مجرمانہ مواد برآمد کیو گیو۔ ڈی جی پی موصوف نے کہیو کہ اس ضمن مانہ مزید کارروائی کرتا مانہ یو اے پی اے قانون غی دفعہ 24 غے تحت میاں عبدالقیوم غا بُل بُل باغ ، برزولا سرینگر مانہ قائم 2 منزلہ رہائشی مکان تے 2 کنال 1 مرلہ تے 90 سکیر فٹ جگہ نانہ ضبط کرلیو گیو ہے۔

\*\*\*\*\*

Dy CM DELEGATION

نائب وزیر اعلیٰ سریندر چوہدری نے گزشتہ روز کہیو ہے کہ سرکار عوامی مشکلات غا بروقت ازالہ تے عوامی خدمات غا اپنا وعداں غی پابند ہے سیول سیکرٹریٹ جموں مانہ منعقد عوامی رسائی اجلاس غے دوران وزیر موصوف جموں تے سرینگر تیں آیا کئی عوامی وفود نال ملاقی ہویا ان وفود نے موصوف غے سامنے اپنا علاقہ گا کئی معاملات رکھیا نائب وزیر اعلیٰ نے وفود غی گل بات غور نال سُنی تے یقین دوايو کہ تمام جائیز مطالبہ وقت رہتاں مکمل کیا جئیں غا۔

\*\*\*\*\*

RANA ILLEGAL UNITS

جنگلات تے ماحول غا وزیر جاوید رانا نے گزشتہ روز جنگلات محکمہ غا اعلیٰ حکام نانہ ہدایت جاری کی ہیں کہ وے جموں خطہ غے اندر غیر قانونی طور ور قائم کیا گیا کرشر ہاٹ میکس پلانٹ تے بیچنگ پلانٹ غے خلاف سخت کارروائی کریں سول سیکرٹریٹ

جموں مانہ منعقد ایک اعلیٰ سطحی میٹنگ غے دوران موصوف نے سخت ہدایت جاری کرتا وں کہو کہ جنگلات غے قریب اس طرز غا صنعتی مرکزوں غا کم کاج غی جانچ کی جے وزیر موصوف نے مزید کہو کہ جنگلات قوانین غی خلاف ورزی کرن آلا تمام صنعتی مرکزوں غے خلاف قانونی کاروائی کی جے تے زمینی سطح وں ان ہدایتوں غا نتیجہ وی برآمد ہونا چاہیے۔

\*\*\*\*\*

## SAKEENA FEE FIXATION

تعلیم غی وزیر سکینہ اتو نے گزشتہ روز سول سیکرٹریٹ سرینگر مانہ ایک میٹنگ غی صدارت کی جس مانہ جموں کشمیر یوٹی غے اندر تمام نجی اسکولوں غا فیس ڈھانچہ تے دیگر ضابطوں وں تبادلہ خیال کیو گیو وزیر موصوف نے کہو کہ تعلیم ایک سماجی ذمہ داری ہے تے غیر معیاری فیس ڈھانچہ غی وجہ نال کوئے وی طالب علم تعلیم حاصل کرن تیں محروم نہیں رہنو چاہیے۔ میٹنگ غے دوران موصوف نے تمام افسران مانہ ہدایت جاری کی ہیں کہ وے موجودہ ضابطوں غی عمل آوری سختی نال کراویں تے نجی اسکولوں غی طرفوں فیس بدھان یا دیگر ضابطوں غی خلاف ورزی کرن وں سخت کاروائی کریں۔

\*\*\*\*\*

## JU CONVOCATION

جموں یونیورسٹی غی 19 ویں کنووکیشن آج 11 بجے منعقد ہو رہی ہے اس خصوصی کنووکیشن غے دوران سال 2020 تیں سال 2024 توڑی پی ایچ ڈی غی ڈگری حاصل کرن آلا تمام امیدواران مانہ پی ایچ ڈی غی ڈگری تفویض کی جئیں غی مذکورہ سالوں غے اندر تقریباً 425 طالب علموں نے بکھ بکھ شعبوں مانہ پی ایچ ڈی کی ہے اس موقع وں جموں یونیورسٹی غا وائس چانسلر لیفٹیننٹ گورنر منوج سنہا اس کنووکیشن غی صدارت کریں گا تے یونیورسٹی غا پرو چانسلر وزیر اعلیٰ عمر عبداللہ اس موقع وں مہمان اعزازی وں گا۔

\*\*\*\*\*

## CSIR IIM WORKSHO

(AI-D2A 2025) سی ایس آئی آر، آئی آئی ایم جموں غی طرفوں گزشتہ روز 3 روزہ کانفرنس غی شروعات کی گئی اس کانفرنس گو افتتاح سی ایس آئی آر سیری پلینی غا ڈائریکٹر ڈاکٹر پی سی پنچیری نے کیو جہیرا اس تقریب مانہ مہمان خصوصی وی تھا اس موقع وں جی ایم سی کٹھوعہ گا پرنسپل ڈاکٹر سریندر کمار اتری مہمان اعزازی تھا ڈاکٹر پنچیری نے اس کانفرنس غے دوران خطاب کرتا وں ادویات غی دیافت مانہ مصنوعی ذہانت اے آئی گا استعمال تے اس طرز غی دیگر ایجادات وں تفصیلی روشنی پائی۔

\*\*\*\*\*

## FLORI DEPTT VANDE MATRAM

قومی گیت وندے ماترم غا 150 سال مکمل ہون غی تقریبات گا سلسلہ مانہ ضلع ڈوڈہ غا بینر تلے A Salute to Mother Earth غا باغبانی محکمہ نے ضلع غے اندر شجر کاری مہم غی شروعات گورنمنٹ ہائی اسکول سیری، بلا تیں کی جت اسکول گا احاطہ غے اندر کئی پودا لایا گیا اسے طرح پنچائیت سنگوئی بہدرواہ تے منوا مانہ

وی کئی پودا لایا گیا ان اقدامات کو مقصد ماحولیاتی تحفظ تے حُب الوطنی گا جزبہ نانہ  
فروع دینو ہے۔

\*\*\*\*\*